

Carta na jnda we na seiljeii Juan

Cantyja 'naa' ñ'oom na mayuu' ñequio na wi' ts'om ts'a' x'iaa'

1 ¹ Maja na cwiluiitquiendyo, matseiljeiya cartawaañe na matseicwanoⁿya na m'aaⁿ 'u nomnn'aⁿya na macwji' Ty'o^oots'om cwentaaⁿa' ñequio ntseinda'. Ñ'oom na mayuu' na jeeⁿ wi' ts'o^oya 'o na cwila'jomndyo' ñequio ñ'oom na mayuu'. Ndo' nchii macanda ja wi' ts'o^oya 'o mati cha'tsonde nn'aⁿ na cwita'jnaaⁿna ñ'oom na mayuu'. ² Wi' ts'o^oya 'o nc'e ñ'oom na mayuu' na waana' quii' n'o^oya na ñequii'cheⁿ nnc'oomna' ñ'eⁿndyo. ³ Nquii Ty'o^oots'om na cwiluiiñe Tsotyaaya ñequio Jnaaⁿ Jesucristo quiana naya na la'xmaⁿna naquii' n'om'yo' ñequio juu na m'aaⁿ na wi' n'omna 'o ñequio juu na tjaa ñomtiuu c'om'yo' jo ndaana nc'e ñ'oom na mayuu' ndo' na candya' n'omna 'o.

⁴ Jeeⁿ neiⁿya na ljeiya nt'om ntseinda' cwilajomndyena ñequio ñ'oom na mayuu' cha'xeⁿ nquii Tsotyaaya Ty'o^oots'om jnda sa'ntjoom. ⁵ Ndo' je' 'u nomnn'aⁿya na matseyu', macaⁿa njom' na c'o^oya na jnda nquiuuya nn'aaⁿya na cwilayu'. Ñ'oomwaa' na matseiljeiya nchii ñ'oom xco na matsa'ntjomna', ñecwii xjeⁿ juuna' cha'xeⁿ ñ'oom na ñejndyaa najndyee. ⁶ Luaa waa na ma'moⁿna' na jnda nquiuuya nt'omcheⁿ, na c'o^oya na cwila'candaⁿndyo ñ'oom'm na cwitsa'ntjomna' cha'xeⁿ ñ'oom na tyondye'jndyee'yo' na c'o^oya na wi'n'o^oya nn'aⁿ na cwila'yu'.

M'aⁿ nn'aⁿ na cwinquio'nn'aⁿ

⁷ Jndye nn'aⁿ m'aⁿ tsjoomnancue na cwinquio'nn'aⁿ na cwiluena na tiyuu' na jndyo Jesucristo na ts'aⁿ jom. Ts'aⁿ na luaa' mach'ee cwiluiiñe ts'aⁿ na manquiu'nn'aⁿ, ndo' ts'aⁿ na wjaa nacjoo' Cristo. ⁸ Jo' chii cal'a'yo' cwentaa na juu ts'iaaⁿ na jnda ñel'a'yo' titseicwaqueⁿna' na cwe' ts'iaaⁿndyo cha candaⁿ nnto'ñoom'yo' na nntantjom'yo'.

⁹ Meiⁿquia ts'aⁿ na nncwinom' ñ'oom na waa cantyja 'naaⁿ Cristo, ticaljoo'ñe ñequio ñ'oom na t'mo^o, tic'oom tsaⁿñeeⁿ ñ'eⁿ Ty'o^oots'om. Saa ts'aⁿ na cwiljoo'ñe ñequio ñ'oom na ma'moⁿna' cantyja 'naaⁿ Cristo, tseixmaⁿ tsaⁿñeeⁿ cwentaa' Ty'o^oots'om ndo' ñequio Cristo. ¹⁰ Xeⁿ nncwjee'cañoom ts'aⁿ 'o ndo' nchii mañequiaaⁿ ñ'oom na mayuu' cantyja 'naaⁿ Cristo, meiⁿ tilaljo'yo' jom l'a'yo' meiⁿ na ñnequia'yo' na xmaⁿñê. ¹¹ Ee ts'aⁿ na mañequiaa na xmaⁿñê, matseijomñe ñequio natia na matseixmaaⁿ.

Ñ'oom na macandā na matseineiⁿ Juan nacjoo' cartawaañe

¹² Jndye ñ'oom maniom na mañe'catseinaⁿtyaya ñ'eⁿndyo'. Saa ticatseitiuuya na nncwil'uee'ndyo_o tsom canchii' ñequio ndaantom. Ee ntyjaa'ya cwii ts'ooⁿ na nncjocando_o'a 'o na nlanāⁿ ntyjaa ndaaya. Ndo' ntyjiiya na t'maⁿ nquioo na neiiⁿya xjeⁿ na nl'aaya na ljo'.

¹³ Joo ntseinda nomnn'aⁿ na m'aⁿ ñjaaⁿ na macwji' Ty'oots'om cwentaaⁿ'aⁿ cwila'cwanomna na xmaⁿndyu'. Mantya luaa' ñ'oom na matseiljeiya.